

Script Of Evening Gojri News Bulletin 19 June 2024 at 1700 Hrs

ايوننگ گو جری نیو ز بلیٹن مو رخہ 19 جون 2024

یوہ آکا شوانی جموں ہے محمد مبارک ماہر تے ظفر اقبال تیں خبر سُنو۔ پہلاں خاص خاص خبر۔

- *1- وزیر اعظم نریندر مودی نے راجگر بہار مانہ نواں تعمیر شدہ نالندہ یونیورسٹی کیمپس غو افتتاح کرتاں وان کہیو کہ اس ادارہ غی غیر معمولی بحالی، ابھرتا وا بھارت غی صلاحیت اور طاقت غی نشانی ہے۔
- *2- نائب صدر جمہو ریہ جگدیپ دھنکڑ نے کہیو ہے کہ قبائلی سماج غو بھارتی معیشت مانہ اک نمایاں مقام ہے۔
- *3- وادی کشمیر غا ضلع بارہمولہ غا ہادی پورہ سوپور علاقہ مانہ دہشت گرداں تے حفاظتی دستاں بشکار جاری اک ٹاکرا غے دوران 2 دہشت گرد ہلاک کر دتا گیا ہیں۔
- *4- تے کھان پین تے ڈبہ بند کرن غا مرکزی وزیر چراغ پاسوان نے پورا ملک مانہ خوراک غی سرمایہ کاری بارے ٹیکنالوجی تے بندو بست نانہہ ہادو دین بارے منصوباں غو اعلان کیو ہے۔

خبراں غی تفصیل نال پہلاں محمد مبارک ماہر۔

PM Nalanda

وزیر اعظم نریندر مودی نے راجگری غی نالندہ یونیورسٹی غا سوشما سوراج آڈیٹوریم مانہ اپنا خطاب غے دوران 2047 تک بھارت نانہہ اک ترقی یافتہ ملک بنان غا سلسلہ مانہ علم غا اہم کردار ور زور دتو۔ انہاں نے نالندہ یونیورسٹی غا نواں کیمپس غو افتتاح کرتاں وان اس نانہہ بھارت غی شناخت تے روایات غی نشانی غا طور ور اجاگر کیو۔ وزیر اعظم نے کہیو کہ یونیورسٹی غی تجدید اُرتا وا بھارت غی ترقی نانہہ ماحولیاتی تحفظ سنگ جوڑ غے مضبوطی غی نشاندہی کرے۔ اُن نے نوی تعلیمی شناخت غا حامل بھارت نانہہ اک بڑا علمی مرکز غا طور ور دوبارہ قائم کرن خاطر سرکار غی کوششاں نانہہ سراہیو۔ اس تیں علاوہ وزیر اعظم نے قدیم نالندہ یونیورسٹی غا کھنڈرات غو وی دورو کیو۔ جہڑا کہ عالمی ثقافتی ورثو ہیں۔ اس موقع ور بولتاں وان خارجہ امور غا وزیر ڈاکٹر جے شنکر نے بین القوامی تعلقات نانہہ بدھان، تعلیم، تربیت تے کئی دوجی چیزاں ور لو کھلی۔ واضع رہ جے مذکورہ تقریب مانہہ 17 ملکاں غا سفیراں نے شرکت کی ہے۔

VP Sickel Cell

نائب صدر جمہو ریہ جگدیپ دھنکڑ نے بھارت غی معیشت مانہہ قبائلی برادری غی نمایاں شراکت نانہہ اجاگر کرتاں وان اس نانہہ ملک غی پشان غو اک اہم حصو قرار دتو ہے۔ مدھیہ پردیش غا ڈنڈوری علاقہ مانہہ منعقد اک عالمی عالمی سیکل سیل غا خاتمہ غا تہاڑا غی تقریب سنگ خطاب کرتاں وان نائب صدر جمہو ریہ نے کہیو کہ وزیر اعظم نریندر مودی غا نظریہ غے مطابق سیکل سیل ناں غی بیماری نانہہ ختم کرن واسطے حکومتی عزم غی 2047 تک توثیق کی ہے۔ نائب صدر جمہو ریہ نے اس عزم غا مظاہرہ غا طور ور آیوشمان کارڈ مانہہ سیکل سیل ناں غی بیماری غا علاج نانہہ شامل کرن ور زور دتو۔ اُن نے قبائلی برادریاں واسطے آئی دفعات ور عمل درآمد غا سلسلہ مانہہ پچھلی اک دھائی غے

دوران سرکار غی کوشش نمانہ اُجاگر کیو۔ نائب صدر جمہوریہ نے اجتماعی ذمہ داری ور زور دیتاں واں اس بیماری غا بارا مانہ غلط فہمیاں نمانہ ختم کرن ور زور کھلیو۔ اُن نے اس موقعہ ور اپنی رہائش گاہ ور اک نواں جڑی بوٹیاں ور مشتمل اک باغ غی تعمیر با رے وی اعلان کیو جس مانہ ڈنڈوری تے مدھیہ پر دیش سنگ تعلق رکھن آلا بوٹاں غی خاصیت وی شامل وے گی۔

PM Sickle Cell

وزیر اعظم نریندر مو دی نے کہیو ہے کہ سرکار سیکل سیل غی بیماری با رے درپیش للکاراں سنگ نمڑن واسطے ٹیکنالوجی غی طاقت غو فائدو چاہ رہی ہے۔ عالمی سیکل سیل غا تہاڑا غا موقعہ ور وزیر اعظم نریندر مودی نے اس بیماری ور قابو پان خاطر سرکار غا عزم نمانہ ڈہرایو۔ اک سوشل میڈیا پوسٹ مانہ اُن نے کہیو کہ پچھلے بہرے مرکز نے قومی سیکل سیل انیمیا غا خاتمہ واسطے مشن شروع کیو۔ جس مانہ بیداری پیدا کرن تیں علاوہ عالمی اسکریننگ تاولاں پتو لان تے مناسب دیکھ بہال سمیت بکھ بکھ پہلوہاں ور کم چل ریبو ہے۔ مرکزی وزیر صحت جے پی نڈا نے کہیو کہ سرکار تاولاں تشخیص نمانہ باہدو دین ، علاج تک رسائی نمانہ یقینی بنان تے بیماری تیں متاثرہ افراد غی دیکھ بہال غا معیار نمانہ بہتر بنان با رے توجہ مرکوز کر رہی ہے۔

Juel Oram Sickle Cell

قبائلی امور غا مرکزی وزیر جُول اُرم نے کہیو ہے کہ سیکل سیل بیماری غا بارا مانہ سب تیں بڑی غلط فہمی یاہ ہے کہ یاہ صرف قبائلی لوکاں نمانہ متاثر کرے۔ ایمز نوی دہلی مانہ سیکل سیل غی بیماری بارے اک قومی سطح غا بیداری بارے اجلاس سنگ خطاب کرتاں واں منکورہ وزیر نے کہیو کہ متا تیں متا لوکاں نمانہ اس بیماری غے بارے جانکاری ہونی چاہیے۔ کیونجے یاہ کسے نمانہ وی متاثر کر سکے۔ اُن نے کہیو کہ ا علاج نمانہ انسانی ترقی کا چشمہ سنگ دیکھنو چاہیے۔ وزیر موصوف نے مزید کہیو کہ اس بیماری غی جانچ واسطے گرام پنچائتاں تے آنگن واڑی مرکزیاں مانہ زمینی سطح ور کم کرن غی لوڑ ہے۔ اُن نے کہیو کہ بین الضابطہ تعاون وی بہت ضروری ہے کیونجے بہت ساری وزارت تے محکمہ اکثر للکاراں تیں لا علم وین۔

Hajj Pilgrame Heat Wave

اس سال حج غا فریضا واسطے گیا وا 550 لوکاں غی سخت لو غی وجہ توں موت واقع ہو گئی ہے۔ قابل ذکر ہے جے ان لوکاں غی موت غی وجہ 50 ڈگری توں متو درجہ حرارت دسیو جا ریبو ہے۔ فوت ہوا وا لوکاں مانہ سب توں متی گنتری مصر غا عازمین حج گی ہیں جن غی کُل تعداد 320 ہے۔ جا رڈن غا سفارتی ذرائع نے دسیو ہے جے اُن غا مُلک سنگ تعلق رکھن آلا وی 60 افراد سخت لو غی وجہ توں وفات پاگیا ہیں۔ تے اُن غا مُلک غی تعداد اجاں مزید بدھ سکے۔ قابل ذکر ہے جے حج غو فریضو ادا کرن گیا وا لوک عرفات غا پہاڑ ور دن مانہ کافی چر توڑی دُعا منگتارین یا درہ جے حج کرنو اسلام غا 5 ستوناں وچوں اک ستون ہے۔

IMD

بھارتی محکمہ موسمیات نے کہیو ہے کہ شمال بھارت مانہ کل توں اس مہینہ غی 21 تا ریخ تک لوکاں نانہ تتی لو توں راحت لین غی امید ہے۔ یاد رہے کہ اس لو تیں راحت لین غی وجہ مغربی ہواواں مانہ اٹھل پٹھل دسی جا رہی ہے۔ آکا شوانی سنگ گل کرتاں واں آئی ایم ڈی غا سائینسدان آر کے جینا منی نے کہیو ہے کہ مغربی ہواواں غی وجہ توں ملک غا شمالی حصہ جن مانہ پنجاب، ہریانہ، دہلی شامل ہیں ان علاقہ مانہ گرج چمک غے نال بارش ہو سکے جس توں لوکاں نانہ لو توں راحت لب سکے۔ محکمہ موسمیات نے مزید دسیو ہے کہ قومی راجدھانی دہلی مانہ اج درجہ حرارت اک توں 2 ڈگری سلیسس کہتیو ہے کہ رات غا درجہ حرارت مانہ کوئی کمی نہیں آئی ہے۔ محکمہ نے مزید جانکا ری دتی ہے کہ سال 1969 توں بعد گذشتہ رات پہلی ایسی رات تھی جیہڑی سب توں گرم رہی۔ جناب جینا منی نے مزید دسیو ہے کہ اس سال مغربی ہواواں غی اٹھل پٹھل نہ ہون غی وجہ توں گرمی مانہ کا فی باندو ہووے۔ جنوبی مغربی مون سون بارے گل کرتاں واں محکمہ موسمیات نے دسیو ہے کہ اس سال امید کی جا رہی ہے کہ مرکزی بھارت مانہ مونسون جلد ہی آوے گی کہ مشرقی بھارت مانہ اگلاں آلا 5 تہاڑا مانہ شروع وے گی۔

Murgan Kissan

اطلاعات و نشریات غا وزیر مملکت ڈاکٹر ایل مروگن نے کہیو ہے کہ وزیر اعظم نریندر مودی نے لوک سبھا 2024 غا چناؤ جتن توں بعد تیجی بار وزیر اعظم غو حلف لے غے تا ریخ رقم کر غے یاہ گل ثابت کر دتی ہے کہ ان غی سرکار کساناں عورتاں تے نوجوان طبقہ غا فائدہ واسطے کم کر رہی ہے۔ سماجی میڈیا سنگ تروانا ملائی مانہ گل کرتاں واں مرکزی وزیر نے خوشی گو اظہار کرتاں واں کہیو ہے کہ وزیر اعظم غا تیجی بار حلف لین توں بعد یاہ پہلی ایسی سکیم ہے جس غے ذریعے وزیر اعظم مودی نے کسان سمان ندھی غی 17 ویں کشت جاری کی ہے۔ مرکزی وزیر نے کساناں نانہ یقین دھانی کرتاں واں کہیو ہے کہ یوہ پیسو کساناں غا خرچ مانہ کا فی مدد کرن توں علاوہ ان نانہ غیر سرکاری قرضو دین آلاں توں وی بچاوے گو۔

یہ خبر تم آکا شوانی جموں تیں سن رہیا ہیں خیراں غا باقی حصہ نال ظفر اقبال۔

Encounter JK

شمالی کشمیر غا ضلع بارہمولہ غا سوپور ہادی پورہ علاقہ مانہ حفاظتی دستاں تے دہشت گرداں غے ہشکار چل رہیا ٹاکرا مانہ 2 دہشت گرد ہلاک کر دتا گیا ہیں۔ پولیس ذرائع نے دسیو ہے کہ حفاظتی دستاں نانہ اج سویرے دہشت گرداں بارے اک پکی سٹو لین توں بعد فوج نے علاقہ نانہ اپنا گھیرا مانہ لے غے تلاشی کا روائی شروع کر دتی تھی۔ اسے دوران دہشت گرداں نے حفاظتی دستاں ورگولی باری شروع کر دتی۔ جوابی کاروائی مانہ فوج نے 2 دہشت گرد مار مکا یا ہیں۔

Arrest Doda

جموں کشمیر پولیس تے فوج نے اک سانجھا کاروائی کرتاں واں اس ویلے کامیابی حاصل کر لی کہ جد اک نوجوان ایس پی او غی بندوق لے غے فرار ہو رہیو تھو۔ قابل ذکر ہے کہ یوہ نوجوان ضلع ٹوڈہ گا ترون علاقہ تیں گرفتار کر ليو گیو۔ یوہ معاملو اس ویلے پیش آيو کہ جد اک ایس پی او سفدر حسین اپنی گڈی مانہ اپنا گراں در جا رہیو تھو تے اسے دوران

محمد رفیع نامی مقامی نوجوان نے ایس پی او جوان کولوں بندو کھس لی۔ اس سلسلہ مانہ بولتاں واں ڈوڈہ غا ایس ایس پی جا وید اقبال نے گل کرتاں واں اس طرح کہیو۔۔ بانٹ۔۔

Paswan Food Processing

کھان پین تے ڈبہ بندی کرن غا مرکزی وزیر چراگ پاسوان نے کہیو ہے جے سرکار کو شش کر رہی ہے جے واہ ہر ریاست مانہ اناج تکنیک تے اس غا بندو بست واسطے قومی ادارہ بناوے۔ یاہ گل انہاں نے اج میڈیا سنگ نوی دہلی مانہ ورلڈ فوڈ انڈیا 2024 کانفرنس ہون گا سلسلہ مانہ کہی جہیڑی جے اس سال غا ستمبر مہینہ مانہ قومی راجدھانی دہلی مانہ منعقد وے گی۔ جناب پاسوان نے مزید کہیو جے کھان پین تے ڈبہ بند کرن غا سیکٹر مانہ کافی صلاحیت ہیں جہیڑو جے پیداوار کرن توں علاوہ کساناں غی آمدنی وی بدھاوے گو۔ مرکزی وزیر نے کھان پین بارے بکھ بکھ جگہاں ور ڈھانچہ بنا غے اُت کھان پین غی اشیاء بنان بارے وی گل کہی۔ جناب پاسوان نے صحت صفائی بارے گل کرتاں واں کہیو جے آتا 5 سالان مانہ سبزیاں تے میواں نانہ خراب ہون توں بچان واسطے وی کم کیو جائے گو۔

Yoga Day Rajouri

بین القوامی یوگا تہاڑو منایا جان غا سلسلہ مانہ ضلع راجوری مانہ تمام تر تیاریں مکمل کر لی گئیں ہیں۔ اس سلسلہ مانہ ضلع راجوری مانہ 21 جون نانہ 1 ہزار توں 12 سو لوگ شرکت کریں گا۔ اس سلسلہ مانہ ضلع راجوری غا مہارا نمائندہ شکتی پال نال گل کرتاں واں ضلع آیوش افسر راجوری ڈاکٹر راکیش کمار نے اس طرح کہیو۔۔ بانٹ۔۔

Yoga Poonch

آن آلا بین القوامی یوگا تہاڑا غا سلسلہ مانہ ضلع انتظامیہ پونچھ نے اج ضلع غا سپورٹس سٹیڈیم مانہ اک پروگرام منعقد کر غے یوگا تہاڑو منایا جان غے بارے یوگا غی مشق کی گئی۔ قابل ذکر ہے جے اس پروگرام مانہ ضلع غا افسراں توں علاوہ طالب علمان تے بکھ بکھ محکمان غا عہدیداراں نے وی حصو لیو۔ ضلع غا اے ڈی سی سندیش شرما نے دسیو جے پروگرام غو مقصد لوکاں نانہ یوگا غا فائداں بارے جانکاری دینو تھو۔ اس پروگرام مانہ حصو لین آلا تمام تر افراد مانہ جوش و جذبہ دیکھیو گیو۔ قابل ذکر ہے جے اس پروگرام مانہ آن آلا تمام افسراں تے طالب علمان نے یوگا غی مشق وی کی۔ اس سلسلہ مانہ بولتاں واں اے ڈی سی پونچھ سندیش شرما نے آکا شوانی غا مہارا نمائندہ انوبھوؤ مصری سنگ گل کرتاں واں اس طرح کہیو۔۔ بانٹ۔۔

PM Yoga

جون 21 نانہ بین القوامی یوگا تہاڑا غا 10 شمارہ غا سلسلہ مانہ وزیر اعظم نریندرمو دی نے اج سوشل میڈیا ور اک ویڈیو کلپ سانجھی کی۔ جس مانہ ششانک آسن غو مظاہرو کیو گیو۔ مذکورہ ویڈیو کلپ صحت بخش فائدہ بیان کرن غے نال نال اس نانہ انجام دین بارے طریقہ کار ور تفصیلی ہدایت فراہم کی گئی ہیں۔ اس کلپ مانہ دسیو گیو ہے کہ کس طرح ششانک آسن قبض تے کنڈ غا درد نانہ دور کرن غے نال نال تناؤ اور غصہ نہ کہٹ کرن مانہ مددگار ثابت وے۔ اس کلپ مانہ بی پی تے گھٹیا غا مریضاں نانہ صلاح دتی گئی

ہے کہ وے اس آسن نانہہ کرتے ویلے احتیاطی تدابیر اختیار کریں یاہ اس تیں مکمل پرییز
کریں۔

اس غے نال ہی خبراں غو یوہ بلیٹن ختم ہوؤ۔